

In der Falle

1. Markiere deinen Text mit Farbe, so dass du ihn schnell findest.
2. Übe deine Rolle, so dass du dich nicht mehr auf den Inhalt konzentrieren muss.
3. Versuche dich in die Rolle zu versetzen und versuche den Text so auszusprechen, wie es unter "Besonderheit" beschrieben ist.
4. Übt nun den die Szene in der Gruppe.

Rolle	Abkürzung	Besonderheit	Leseniveau
Erzähler:in	E	Ruhige Stimme	hoch
Winnie	W	Flippig, schnell, fröhlich	mittel
Tack	T	Nachdenklich, ängstlich	tief
Magierin (als Krähe)	M	Krächzende Stimme	hoch

T+W	<i>Rennen:</i> Uff... schnauf.... phuu...
W	Oh nei, ich gseh d'Soldate scho uf de andere Siite vo de Brugg! Und de uf em schönste Ross muss de Vogt si, de het so en grosse Huet mit Fädere ah und tüüri Gwänder!
M	Jaa genau, das isch de hinterlistigi Vogt von Eisenbach. ...Er zögeret... wahrschindlich isch er sich nöd sicher, ob die lottrigi Brugg ihn und sini Männer mitsammt de Ross träge chan. Vilicht simmer da sicher.
V	Verfolged si! Überd Brugg Soldate! Schnapped di „sogeananti Magierin“ und ihri Hälfer!
W	Oh nei, si traued sich wohl <u>doch</u> übere zcho, was mached mer jetzt nur? Ich glaub es bringt nüt, no länger vo ihne devo zränne, mit de Ross holeds ois eh ii! Taaaakk... wo blibed dini guete Idee wenn mer si bruucht?
T	Psst.... ich bin am überlege.... <i>murmelnd:</i> wenn alli glichziitig... mit de Ross... ide Mitti...s' Tragseil....hmmm... <i>Laut:</i> ICH HAS! LÖND MICH NUR MACHE!
W	Aber... du machsch ja gar nüüt.... söled mer da eifach warte, bis si ois gfange nämed?

T	<i>Flüstert:</i> Vertrau mir!
E	<p>Owe owe.... d'Winnie wird chridebleich, was wüekli <u>sälte</u> vorchunt und de <u>Zauberin</u> hets ganz klar d'Sprach verschlage. Was het ächt de Tack vor? Wi söleds gäge das Duzend starke Soldate uf ihrne Ross nur irgend e Chance ha?</p> <p>... was macht denn jetzt de Tack? Ganz unuffällig zieht er sin Dolch usem Rucksack... versteckt en hinder sim Bei und fixiert glichziitig ohni z'blinzle d'Soldate... er schiint uf öpis z'warte... aber d'Soldate chömed doch immer näher! Jetzt sinds scho i de Mitti vo de Brugg..</p> <p>Oh... und JETZT zückt de Tack sin Dolch und halted ihn direkt obe am Hauptseil vode Brugg.</p>
T	<p><i>Ruft laut:</i> Heee.... Vogt!</p> <p>Ich würd dir nöd empfehle, au nur EIN Schritt nöcher zcho! Mit mim Dolch chan ich i nullkoma-nichts s'Trageseil zerschniide und ihr stürzed is Tobel!</p>
V	<p><i>Schreit:</i> Stopp! Soldate, halt! Stillgestanden! Wart nur Büstli wänn ich dich id Finger krieg, dänn hät dis letscht Stündli gschlage! Und säg mal, wer bisch du überhaupt, du lumpige Burscht!</p>
T	Ich bin de Tack... und uf mis Wort isch verlass! Also unterstah dich nöcher zcho, suscht landet ihr alli da im Tobel une!
E	Wow... wie muetig de Tack isch! De Vogt luegt total irritiert us de Wösch. Mit de Ross chan er uf dere änge Brugg unmöglich cheerä.
V	Was wänd ihr vo mir und mine Soldate?
T	Mir wänd, dass d'Frau Makrux und alli lwohner vo Meile in Rueh glah werdet und nüme münd hungerä. Si söled chöne selbständig über ihres Land und ihres Dorf entscheide!
V	Pha, sicher nöd... wiso söl ich das mache?

T	Wenn du dich, dini Manne und dini Ross wetsch rettä, blibt dir kei anderi Wahl!
E	Was für e Idee vom Tack! Hmm... aber de Tack isch grad beschäftigt. D'Magierin het ihm öpis is Ohr gflüsteret. Und scho rüeft de Vogt sini Antwort:
V	Ok, ich verspriche im Name vo all mine Ländereie, d'Frau Makrux und s'Dorf in Rueh zlah und mini Soldate abzzieh. Jetzt pack din Dolch wider ii.
M	Tack, de Vogt wird sich niemals a sis Verspräche halte! Ich känn ihn, er isch vil z'hinderlistig!....aber... da chunt mir e Idee! Wart mal..... <i>(sucht in ihrem Mantel)</i> ... wo han ich nur.... ich hoffe s'isch no ganz... <i>(Fläschchen gefunden)</i> ... das ischs nöd... nei... AH, JETZ HANIS! Lueged! Das isch e chlini Phiole voll Sedrium-Serum. Was mer diräkt nach em Trinke vo dem Serum seit, MUES erfüllt werde, es zwingt eim, zu sine Wort zstah. Wenn mer de Vogt dezue bringed, das ztrinke und denn sis Verspräche zwiderhole, chan nüt meh schief gah!
W	Bombastisch! Das mached mer so... aber, wenn öper vo ois ihm das Fläschli bringt, isch er au uf de Brugg und oisi Drohig mitem Dolch bringt nüt meh!
T	Hmmm.... aber ich känn öper, wo d'Phiole chönt bringe, ohni in Gfahr zsi!
E	Jetzt bin ich ja gspannt! De Tack känn doch gar niemert im 18. Jahrhundert! ... und überhaupt, wo wet er so schnäll öper herhole? Aaahh.... schnäll weckt er de Ikarus i sinere Manteltäsche und erchlärt ihm sin Auftrag. Miteme Stück Schnur us em Tack sim Rucksack, bindet si em Ikarus d'Phiole vorsichtig uf de Rugge. Fiin setzt de Tack s'chline Gleithörnli ufs Gländer vo de Hängebrugg und scho flitzt los, id Mitti vo de Brugg.

T	He Vogt, mir wüessed nöd ob mir dine Wort chönt vertraue. Als Zeiche, dass du s ernst meinsch, trink das Fläschli us und wiederhol dis Verspräche, denn glaubed mir dir.
V	Was? Ihr stelled au no Forderige? Das isch ja die Höhe! Wartet nur, ich oi krieg ich nachher scho no.... mppff....
E	Aber em Vogt blibt nüt anders übrig und mit knirschende Zäh git er nah. Er löst d'Phiole vom Ikarus, stürzt de Trank i eim Zuug abe, rüert s'Fläschli is Tobel abe und seit nomal:
V	Ich de Vogt von Eisenbach, verspriche d'Magierin und s'ganze Dorf Meile vo jetzt a in Ruhe z'la.
T	Chum zrug, Ikarus! so isch guet. Okay, mir lönd oi jetzt zieh.
W	Uf nimmer widergüx, Vögtli! Tschüüüsss, tschauu.
M	Und dänk dra Vogt von Eisenbach, wänn du dis Verspreche nöd ihaltisch, dänn kipsch uf de Stell tot um.
V	Ihr sind mir ja e Saubandi. Das zahli oi scho no hei, ich finde sicher en Weg! So eifach gib ich mich nöd gschlage. De erste Kampf händer gunne, aber de ganz Chrieg gönn ich!